

Kisah pengorbanan Melayu Pattani runtun jiwa penonton



ATIFAH Lubokyaseng dengan penuh perasaan berpidato semasa pertandingan PABM Piala Perdana Menteri 2014 peringkat suku akhir di UPM, Serdang, Selangor, semalam.

Oleh **SHARIFAH AZMAWATI SYED ABDUL AZIZ** dan **AMIZUL TUNIZAR AHMAD TERMIZI**

pengarang@utusan.com.my

KUALA LUMPUR 23 April - Kisah pengorbanan penduduk Melayu di wilayah Pattani, selatan Thailand dalam mempertahankan identiti bangsa mereka meruntun jiwa penonton pertandingan Pidato Antarabangsa Bahasa Melayu (PABM) Piala Perdana Menteri 2014 di Universiti Putra Malaysia (UPM) dekat sini hari ini.

Peserta dari Thailand, Atipah Lubokyaseng yang berkongsi cerita itu semasa bertanding di pusingan suku akhir kategori alam Melayu turut tersentuh dan tidak dapat menahan air matanya daripada mengalir semasa menceritakan peritjerih perjuangan bangsanya.

"Bahasa Melayu merupakan jati diri

Bahasa Melayu merupakan jati diri bangsa Melayu di Pattani. Bangsa Melayu sungguh rapat dengan Islam sehingga orang akan bertanya sama ada kamu Melayu atau Siam untuk mengetahui agama seseorang di sana

ATIPAH LUBOKYASENG

Peserta

bangsa Melayu di Pattani. Bangsa Melayu sungguh rapat dengan Islam sehingga orang akan bertanya sama ada kamu Melayu atau Siam untuk mengetahui agama seseorang di sana.

"Walaupun bahasa Melayu merupakan bahasa minoriti di Thailand, namun ia bahasa majoriti di wilayah Pattani. Demi mempertahankan identiti mereka, orang Melayu Pattani sanggup berkorban, malah ramai telah kehilangan nyawa," katanya.

Kisah tersebut yang disampaikan oleh Atipah dengan penuh perasaan berjaya membuatkan seluruh penonton di Dewan Besar Pusat Kebudayaan dan Kesenian

Sultan Salahuddin Abdul Aziz Shah UPM tersentuh lalu bangun memberikan tepukan gemuruh sebaik peserta Thailand itu menamatkan penyampaian pidatonya.

Atipah bagaimanapun tidak termasuk dalam senarai lima peserta yang berjaya melayakkan diri ke pusingan separuh akhir kategori alam Melayu PABM 2014 yang akan berlangsung esok.

Lima peserta yang layak ialah Muhammad Tamliikhaa Khamsani dari Singapura, Aiman Ariff Abdul Aziz (Malaysia), Mahamat Yusoh (Thailand), Mohamad Amirull Afiqq (Malaysia) dan Selamat Nur Anom (Indonesia).

